



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/267/2024

Ո Ր Ո Շ ՈՒ Մ

ՎԱՐՉԱԿԱՆ ԻՐԱՎԱԽԱՆՏՄԱՆ ՎԵՐԱԲԵՐՅԱԼ ԳՈՐԾԻ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

ք. Երևան

13 սեպտեմբերի 2024թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող) Արամայիս Փաշինյանի և Լիլիթ Ալեքսանյանի (այսուհետ՝ Հանձնաժողով) 2024 թվականի սեպտեմբերի 13-ին քննելով «Վերածնվող Հայաստան» կուսակցության (այսուհետ՝ նաև Կուսակցություն) հաշվետու ժամանակահատվածում պաշտոնատար անձ՝ կուսակցության նախագահ (այսուհետ՝ պաշտոնատար անձ), Վահե Հակոբյանի կողմից Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 189.16-րդ հոդվածի 1-ին մասով նախատեսված զանցանքի հատկանիշներով առերևույթ խախտման կապակցությամբ հարուցված վարչական իրավախախտման վերաբերյալ թիվ ՎԻՎ/267/2024 գործը՝

Պ Ա Ր Զ Ե Ց

I. Վարչական իրավախախտումների վերաբերյալ գործի վարույթի նախապատմությունը

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 27-րդ կետով սահմանված Հանձնաժողովի լիազորությունների շրջանակներում, նույն օրենքի 40.1-ին հոդվածով սահմանված կարգով իրականացնելով նույն օրենքի 23-րդ հոդվածի 1-ին մասի 9-րդ կետով վերապահված գործառույթը և հիմք ընդունելով Կուսակցության 2022 թվականի տարեկան հաշվետվության (այսուհետ՝

Տարեկան հաշվետվություն) ստուգման և աուդիտի արդյունքում վերհանված տվյալները, պարզել է, որ Կուսակցության կողմից չի պահպանվել «Կուսակցությունների մասին» սահմանադրական օրենքի (այսուհետ՝ Սահմանադրական օրենք) 24-րդ հոդվածի 6-րդ մասով սահմանված պահանջը, այն է՝ Կուսակցությունը «Հանրային Դիվանագիտություն» Բարեգործական ՀԿ-ից նվիրատվություն ստանալուց հետո՝ երկու շաբաթվա ընթացքում այն չի փոխանցել պետական բյուջե:

1.2 Հանձնաժողովի կողմից 2024 թվականի մարտի 15-ին Կուսակցությանն է ուղղվել թիվ 01/700-2024 գրությունը, որով Հանձնաժողովը խնդրել է Կուսակցության 2022 Տարեկան հաշվետվության ստուգման նպատակով հնգօրյա ժամկետում Հանձնաժողով ներկայացնել Տարեկան հաշվետվության ստուգման համար անհրաժեշտ փաստաթղթեր և տեղեկություններ, այդ թվում՝ կուսակցության 2022 թվականի հաշվետու տարվա բոլոր բանկային հաշիվների (բացառությամբ նախընտրական հիմնադրամների) վերաբերյալ տեղեկություններ, բանկի կողմից վավերացված բանկային հաշիվների մուտքերի և ելքերի վերաբերյալ քաղվածքները (առկայության դեպքում նաև դրանց էլեկտրոնային տարբերակները):

Ստուգման արդյունքում պարզվել է, որ «Ծանոթագրություն 2»-ի «2.5 Անշարժ գույքը շուկայական արժեքից էականորեն ցածր գնով կուսակցությանը վարձակալության կամ անհատույց օգտագործման հանձնելու արդյունքում հաշվարկված մուտքեր» աղյուսակի 2-րդ տողում լրացվել են «Հանրային Դիվանագիտություն» Բարեգործական ՀԿ-ին պատկանող, ք.Երևան, Շարա Տալյան փ. 38/4 հասցեում գտնվող անշարժ գույքը անհատույց օգտագործման իրավունքով Կուսակցությանը հանձնելու վերաբերյալ տվյալներ:

Ի լրումն վերոգրյալի՝ Հանձնաժողովը խնդրել է Աուդիտորական եզրակացությամբ, ինչպես նաև «Նամակ ղեկավարությանը» փաստաթղթով հայտնաբերված անհամապատասխանությունների և խախտումների հետ անհամաձայնության դեպքում ներկայացնել դրանց վերաբերյալ կուսակցության դիրքորոշումն արտահայտող լրացուցիչ տեղեկություններ և փաստաթղթեր:

1.3 Կուսակցության Տարեկան հաշվետվության ստուգման նպատակով Հանձնաժողովի՝ լրացուցիչ տեղեկություններ և փաստաթղթեր տրամադրելու պահանջի վերաբերյալ

գրությանն (այսուհետ՝ Գրություն) ի պատասխան Կուսակցության կողմից ի թիվս այլ տեղեկությունների՝ ներկայացվել է նաև ք. Երևան, Շարա Տալյան փ. 38/4 հասցեում գտնվող տարածքի անհատույց օգտագործման պայմանագիրը, որի գործողության ժամկետն է՝ 15.12.2022-15.12.2023թթ: Նշված պայմանագրով հավաստվում է Տարեկան հաշվետվությամբ ներկայացված տարածքը «Հանրային Դիվանագիտություն Բարեգործական ՀԿ»-ի կողմից Կուսակցությանը անհատույց օգտագործման հանձնված լինելու փաստը, ինչպիսի նվիրատվությունը «Կուսակցությունների մասին» սահմանադրական օրենքի 24-րդ հոդվածի 1.1-ին մասի, 4-րդ մասի 2-րդ կետի կարգավորումների համատեքստում չի թույլատրվում:

1.4 Աուդիտորական եզրակացության կարծիքի համար հիմք հանդիսացող 3-ին կետի համաձայն, ինչպես ներկայացված է Տարեկան հաշվետվության «Ծանոթագրություն 2» թերթի «2.5 Անշարժ գույքը շուկայական արժեքից էականորեն ցածր գնով կուսակցությանը վարձակալության կամ անհատույց օգտագործման հանձնելու արդյունքում հաշվարկված մուտքեր» աղյուսակի (այսուհետ՝ Աղյուսակ) 2-րդ տողում, Կուսակցությունը 2022 թվականի ընթացքում «Հանրային Դիվանագիտություն» Բարեգործական ՀԿ-ից ստացել է Սահմանադրական օրենքի իմաստով բնեղենով նվիրատվություն, որն ըստ Կուսակցության հաշվարկի կազմել է 29.485 ՀՀ դրամ:

1.5 Ստուգմամբ պարզվել է, որ Տարեկան հաշվետվության «2.5 Անշարժ գույքը շուկայական արժեքից էականորեն ցածր գնով կուսակցությանը վարձակալության կամ անհատույց օգտագործման հանձնելու արդյունքում հաշվարկված մուտքեր» աղյուսակում լրացվել են «Հանրային Դիվանագիտություն» Բարեգործական ՀԿ-ին պատկանող, պատկանող, ք.Երևան, Շարա Տալյան փ. 38/4 հասցեում գտնվող անշարժ գույքը անհատույց օգտագործման իրավունքով Կուսակցությանը հանձնելու վերաբերյալ տեղեկություններ, ինչպիսի նվիրատվությունը Սահմանադրական օրենքի 24-րդ հոդվածի 1.1-ին մասի, 4-րդ մասի 2-րդ կետի կարգավորումների համատեքստում չի թույլատրվում:

1.6 Տարեկան հաշվետվությամբ ներկայացված տվյալներով, ինչպես նաև Կուսակցության բանկային հաշիվների քաղվածքներով առկա չեն «Հանրային Դիվանագիտություն» Բարեգործական ՀԿ-ից ստացված բնեղենով նվիրատվությունը

ստանալուց հետո՝ երկշաբաթյա ժամկետում, պետական բյուջե փոխանցած լինելու վերաբերյալ տեղեկություններ:

1.7 Վերոնշյալ իրավախախտման հայտնաբերմամբ պայմանավորված՝ Հանձնաժողովը 2024 թվականի օգոստոսի 6-ի թիվ 01/2013-2024 գրությամբ Կուսակցության Պաշտոնատար անձ Վահե Հակոբյանին ուղարկել է ծանուցում՝ Կուսակցության կողմից օրենքով սահմանված չափից ավելի կամ չթույլատրված նվիրատվությունները օրենքով սահմանված ժամկետներում պետական բյուջե կամ նվիրատուին չփոխանցելու զանցանքի հատկանիշներով առերևույթ իրավախախտման վերաբերյալ՝ հրավիրելով վերջինիս Հանձնաժողով՝ սույն ծանուցումը ստանալուն հաջորդող 5-րդ աշխատանքային օրը՝ ժամը 15:00-ին, նշված օրը հանդիսանում է 2024 թվականի օգոստոսի 16-ին՝ ժամը 15:00-ին՝ մասնակցելու Օրենսգրքի 189.16-րդ հոդվածի 1-ին մասով նախատեսված վարչական իրավախախտման հատկանիշներով վարչական իրավախախտման վերաբերյալ արձանագրություն կազմելուն, իսկ վերոնշյալ ծանուցումը ստանալուն հաջորդող 7-րդ աշխատանքային օրը՝ ժամը 15:00-ին՝ առերևույթ իրավախախտման հիմքով կազմված արձանագրության և վերաբերելի նյութերի հիման վրա վարչական իրավախախտման վերաբերյալ գործի քննությանը մասնակցելու, նշված գործի քննության օր է հանդիսանում 2024 թվականի օգոստոսի 20-ին՝ ժամը 15:00-ին: Վահե Հակոբյանի կողմից նշված գրությունը ստացվել է 2024 թվականի օգոստոսի 9-ին:

1.8 Վարչական իրավախախտման վերաբերյալ արձանագրություն կազմելու վայրի և ժամի մասին պատշաճ ծանուցված Վահե Հակոբյանը չի ներկայացել Հանձնաժողով, չի ապահովել իր ներկայացուցչի մասնակցությունը, ինչպես նաև մինչև վարչական իրավախախտման վերաբերյալ արձանագրություն կազմելը չի ներկայացրել միջնորդություն այն հետաձգելու համար: 2024 թվականի օգոստոսի 16-ին պատշաճ ծանուցված Վահե Հակոբյանի բացակայությամբ կազմվել է թիվ ՎԻՎ/651/2024 արձանագրությունը՝ Օրենսգրքի 189.16-րդ հոդվածի 1-ին մասով նախատեսված իրավախախտման հատկանիշներով:

1.9 Հաշվի առնելով 2024 թվականի օգոստոսի 20-ին նշանակված գործի քննությունն անցկացնելու անհնարինության փաստը, վարույթի մասնակցին տեղեկացվել է գործի

քննության հետաձգման մասին, այնուհետև հիմք ընդունելով Վահե Հակոբյանի կողմից (էլեկտրոնային փոստի միջոցով) 2024 թվականի օգոստոսի 26-ին ներկայացված միջնորդությունը՝ Հանձնաժողովը նշանակված գործի քննությունը հետաձգել է և նշանակել 2024 թվականի սեպտեմբերի 13-ին՝ ժամը 15:00-ին, և Հանձնաժողովի 2024 թվականի օգոստոսի 27-ի թիվ 01/2739-2024 գրությամբ ծանուցել վարույթի մասնակցին վարչական իրավախախտման վերաբերյալ գործի քննության տեղի և ժամանակի մասին:

1.10 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված (հիմք՝ AL0124187852AM հետադարձ հանձնման ծանուցագիր) Վահե Հակոբյանի ներկայացուցիչ Սեդա Հարությունյանի ներկայությամբ 2024 թվականի սեպտեմբերի 13-ին՝ ժամը 15:00-ին, տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

2024 թվականի սեպտեմբերի 13-ին, ժամը՝ 15:00-ին նշանակված վարչական իրավախախտման վերաբերյալ գործի քննության ընթացքում Կուսակցության պաշտոնատար անձ Վահե Հակոբյանի ներկայացուցիչ Սեդա Հարությունյանը հաստատեց, «Նամակ ղեկավարությանը» փաստաթղթով ներկայացված Կուսակցության ղեկավարության դիրքորոշումը. «Տարածքն անհատույց օգտագործման տրամադրողը հանդիսանում է բարեգործական հասարակական կազմակերպություն, որը համաձայն օրենսդրության և իր գործունեությունը կարգավորող կանոնադրության՝ չի հանդիսանում շահույթ հետապնդող ընկերություն: Այս համատեքստում Պայմանագիրը մեր կողմից դիտարկվել է մեկ այլ համատեքստում: Այսինքն պայմանագիրը կնքել ենք բարեգործական ընկերության հետ անհատույց և պայմանագրի գործողությունը սահմանված է եղել ընդամենը կես ամիս: Եթե այնուամենայնիվ անկախ աուդիտ իրականացնող ընկերությունը ստուգման ընթացքում գտնի, որ մեր կողմից խախտում է իրականացվել, ապա հույս ունենք, որ այդ արձանագրումը չի առաջացնի որևէ նյութական հետևանք, քանի որ այդ տարածքի բնեղեն արժեքը ընդամենը 29,485 ՀՀ դրամ է կազմում, որը օրենսդրության տեսանկյունից չի կարող դիտարկվել որպես խոշոր չափ հետևաբար առաջացնել որևէ բացասական հետևանք»: Միաժամանակ նշել է, որ

իրավաբանական անձի կողմից Կուսակցությանը կատարված 29,485 ՀՀ դրամի բնեղենով նվիրատվությունը՝ որպես չթույլատրված նվիրատվություն, կփոխաքնցվի պետական բյուջե մինչև գործի քննության օրվա ավարտը:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/267/2024 գործում առկա նյութերը, Կուսակցության Տարեկան հաշվետվությամբ ներկայացված տվյալները՝ համադրելով դրանք Կուսակցության բանկային հաշիվների քաղվածքների հետ և հաշվի առնելով Աուդիտորական եզրակացությամբ հայտնաբերված առերևույթ խախտումները՝ կատարել հանգամանքների քննություն, որի արդյունքում հաստատված է համարում.

3.1 2022 թվականի ընթացքում Կուսակցության պաշտոնատար անձ Վահե Հակոբյանի կողմից չի պահպանվել Սահմանադրական օրենքի 24-րդ հոդվածի 1.1-ին, 4-րդ մասի 2-րդ կետով և նույն հոդվածի 6-րդ մասով սահմանված պահանջը, այն է՝ Կուսակցությունը «Հանրային Դիվանագիտություն» Բարեգործական ՀԿ-ից չթույլատրված նվիրատվություն ստանալուց հետո՝ երկու շաբաթվա ընթացքում, այն չի փոխանցել պետական բյուջե, որի արդյունքում թույլ է տրվել Օրենսգրքի 189.16-րդ հոդվածի 1-ին մասով սահմանված արարքը: Հաշվարկված բնեղենով նվիրատվության չափով գումարը Կուսակցության կողմից պետական բյուջե սահմանված ժամկետում չի փոխանցվել, որը հավաստվում է Տարեկան հաշվետվությամբ ներկայացված տվյալներով և Կուսակցության բանկային հաշիվների քաղվածքներով:

Տարեկան հաշվետվության «2.5 Անշարժ գույքը շուկայական արժեքից էականորեն ցածր գնով կուսակցությանը վարձակալության կամ անհատույց օգտագործման հանձնելու արդյունքում հաշվարկված մուտքեր» աղյուսակում լրացվել են «Հանրային Դիվանագիտություն Բարեգործական ՀԿ»-ին պատկանող, ք.Երևան, Շարա Տալյան փ. 38/4 հասցեում գտնվող անշարժ գույքն անհատույց օգտագործման իրավունքով Կուսակցությանը հանձնելու վերաբերյալ տեղեկություններ, ինչպիսի նվիրատվությունը Սահմանադրական օրենքի 24-րդ հոդվածի 1.1-ին մասի, 4-րդ մասի 2-րդ կետի կարգավորումների համատեքստում չի թույլատրվում:

3.2 Մինչև վարչական իրավախախտման վերաբերյալ գործի քննության օրվա ավարտը «Վերածնվող Հայաստան» կուսակցության կողմից 29,485 (քսանինը հազար չորս հարյուր ութսունհինգ) ՀՀ դրամ օրենքով սահմանված չթույլատրված նվիրատվության գումարը փոխանցվել է պետական բյուջե:

3.3 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Վահե Հակոբյանը 2022 թվականին հանդիսանում էր Կուսակցության գործադիր մարմնի ղեկավարը՝ Կուսակցության նախագահը:

Կուսակցության կանոնադրության 9.11-րդ կետի «դ» ենթակետի համաձայն՝ Կուսակցության նախագահը կառավարում է Կուսակցության գույքը և դրամական միջոցները:

IV. Որոշումն ընդունելու իրավական հիմքերը և հիմնավորումները

4.1 «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 9-րդ կետի համաձայն՝ Հանձնաժողովի գործառույթներն են՝ «Կուսակցությունների մասին» սահմանադրական օրենքով սահմանված դեպքերում և կարգով կուսակցությունների ընթացիկ ֆինանսական գործունեության նկատմամբ վերահսկողության իրականացումը, ներառյալ՝ կուսակցությունների ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունների (այսուհետ՝ կուսակցությունների տարեկան հաշվետվություններ) ներկայացման պահանջների պահպանման և դրանցում առկա տեղեկատվության և տվյալների արժանահավատության և ամբողջականության ստուգումը:

4.2 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 27-րդ կետի համաձայն՝ Հանձնաժողովը ստուգում է կուսակցությունների տարեկան հաշվետվությունների ներկայացման պահանջների պահպանումը և դրանցում առկա տեղեկատվության և տվյալների արժանահավատությունն ու ամբողջականությունը:

4.3 Սահմանադրական օրենքի 30-րդ հոդվածի 1-ին մասի համաձայն՝ կուսակցությունների ընթացիկ ֆինանսական գործունեության նկատմամբ վերահսկողությունը, ներառյալ՝ կուսակցությունների տարեկան հաշվետվության

ստուգումն իրականացնում է Կոռուպցիայի կանխարգելման հանձնաժողովը՝ սույն օրենքով և «Կոռուպցիայի կանխարգելման հանձնաժողովի մասին» օրենքով սահմանված կարգով:

4.4 Սահմանադրական օրենքի 24-րդ հոդվածի 2-րդ մասի համաձայն՝ Կուսակցությանը տրվող նվիրատվության, ինչպես նաև անդամավճարի և մուտքի վճարի ընդհանուր չափը՝ դրամական արտահայտությամբ, մեկ տարվա ընթացքում չի կարող գերազանցել օրենքով սահմանված նվազագույն աշխատավարձի հինգհարյուրհազարապատիկը, այդ թվում՝ մեկ ֆիզիկական անձի կողմից՝ օրենքով սահմանված նվազագույն աշխատավարձի երկուհազարհինգհարյուրապատիկը:

4.5 Սահմանադրական օրենքի 24-րդ հոդվածի 1.1-ին մասի համաձայն՝ նվիրատվություն են համարվում նաև կուսակցության օգտին անհատույց աշխատանքների կատարումը, ծառայությունների մատուցումը, կուսակցությանը սեփականության իրավունքով գույքի փոխանցումը, օգտագործման հանձնումը կամ նույն կամ համանման ապրանքների, աշխատանքների կամ ծառայությունների համար գործող շուկայական արժեքից էականորեն ցածր գնով կուսակցության օգտին աշխատանքների կատարման կամ ծառայությունների մատուցման կամ կուսակցությանը սեփականության իրավունքով գույքի փոխանցման կամ վարձակալության հանձնելու հետևանքով կուսակցության մոտ ձևավորված խնայողությունը (բնեղենով նվիրատվությունը): Գործող շուկայական արժեքից տարբերվող գինը համարվում է էականորեն ցածր, եթե այն գործող շուկայական արժեքից տարբերվում է նվազագույնը քսան տոկոսը գերազանցող չափով:

4.6 Սահմանադրական օրենքի 24-րդ հոդվածի 1.2-րդ հոդվածի համաձայն՝ սույն հոդվածի 1.1-ին մասով նախատեսված բնեղենով նվիրատվությունները ենթակա են հաշվարկման իրենց շուկայական արժեքով և պետք է արտացոլվեն կուսակցության տարեկան հաշվետվության մեջ, իսկ դրանց արժեքը (գումարը՝ դրամական արտահայտությամբ՝ պայմանագրով նախատեսված արժեքի և շուկայական արժեքի տարբերության մասով) ներառվում է նվիրատվությունների՝ սույն օրենքով սահմանված առավելագույն սահմանաչափում:

4.7 Օրենսգրքի 189.16-րդ հոդվածի 1-ին մասի համաձայն՝ Կուսակցությունների կողմից օրենքով սահմանված չափից ավելի կամ չթույլատրված նվիրատվությունները օրենքով սահմանված ժամկետներում պետական բյուջե կամ նվիրատուին չփոխանցելը՝ առաջացնում է տուգանքի նշանակում կուսակցության պաշտոնատար անձանց նկատմամբ՝ սահմանված նվազագույն աշխատավարձի հարյուրապատիկից մինչև հարյուրհիսնապատիկի չափով:

4.8 Օրենսգրքի 244.17-րդ հոդվածի համաձայն՝ սույն օրենսգրքի 166.1-ին, 169.28-րդ, 169.31-րդ, 189.13-րդ, 189.14-րդ, 189.15-րդ, 189.16-րդ, 189.19-189.24-րդ, 206.14-րդ հոդվածներով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Կոռուպցիայի կանխարգելման հանձնաժողովը:

4.9 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.10 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.11 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.12 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.13 Օրենսգրքի 275-րդ հոդվածի համաձայն՝ վարչական իրավախախտման վերաբերյալ գործը քննության նախապատրաստելիս մարմինը (պաշտոնատար անձը) լուծում է հետևյալ հարցերը՝

1) տվյալ գործի քննությունը վերաբերում է, արդյոք, իր իրավասությանը.

2) ճիշտ են կազմվել, արդյոք, վարչական իրավախախտման վերաբերյալ գործի արձանագրությունը և մյուս նյութերը.

3) գործի քննությանը մասնակցող անձինք ծանուցվել են, արդյոք, դրա քննության ժամանակի և տեղի մասին.

4) պահանջվել են, արդյոք, անհրաժեշտ լրացուցիչ նյութեր.

5) վարչական պատասխանատվության ենթարկվող անձի, տուժողի, օրինական ներկայացուցիչների, փաստաբանի միջնորդությունների մասին:

4.16 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին: Գործի վարույթը կարճելու մասին որոշում ընդունվում է նաև բանավոր դիտողություն հայտարարելու դեպքում:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենսգրքի 189.16-րդ հոդվածի 1-ին մասով նախատեսված դրույթը նպատակ է հետապնդում ապահովել հաշվետու տարվա ընթացքում Կուսակցության ֆինանսական միջոցների և ծախսերի վերաբերյալ հանրային հաշվետվողականությունը, կոռուպցիոն ռիսկերից զերծ գործունեությունը: Նշված դրույթի նպատակն է **բոլոր կուսակցությունների համար հավասար հնարավորությունների ապահովումը, ինչպես նաև բոլոր կուսակցությունների ֆինանսական խոցելիության նվազեցման երաշխիքների ապահովումը:**

Նշված դրույթը նպատակ է հետապնդում վերացնել կոռուպցիոն այնպիսի ռիսկեր, ինչպիսիք են, օրինակ, կուսակցության ղեկավար մարմնի անդամի կողմից օրենքով սահմանված չափը գերազանցող նվիրատվության ներգրավումը: Այս զանցակազմի օբյեկտիվ կողմը կարող է դրսևորվել կուսակցության ղեկավար մարմնի անդամի ակտիվ, նախաձեռնողական գործողություններով, երբ վերջիններս ձեռնարկում են կուսակցության օգտին օրենքով սահմանված չափը գերազանցող նվիրատվությունների ներգրավումը կամ պարզապես համաձայնություն են տալիս այդպիսի առաջարկություններին:

Հարկ է ընդգծել, որ Օրենսդրի կողմից նման կարգավորումների՝ սահմանադրական օրենքով ամրագրումն ինքնանպատակ չէ և միտված է կարգավորելու կուսակցությունների մուտքերը՝ կանխելու կուսակցությունների կախվածությունը ֆիզիկական և իրավաբանական անձանցից, նպաստելու կուսակցությունների միջև ավելի հավասար պայմանների ապահովմանը, սահմանափակելու կուսակցությունների վրա անտեղի ազդեցությունը, խթանելով արդարությունը և նվազեցնելով կոռուպցիայի ռիսկը: Նման կարգավորումների պայմաններում սահմանափակվում են անհատական ներդրումները, ինչը խթանում է քաղաքական գործընթացներում լայն հասարակության ավելի մեծ ներգրավվածությունը և մասնակցությունը:

Միաժամանակ, ֆիզիկական և իրավաբանական անձանցից կողմից մեծածավալ նվիրատվությունները կարող են հանգեցնել արտոնյալ վերաբերմունքի կամ քաղաքական որոշումների վրա ազդեցության ակնկալիքների և վերը նշված նորմով մեղմվում են նման ռիսկերը՝ դրանով իսկ նպաստելով քաղաքական գործընթացների ամբողջականությանը:

Միաժամանակ, նշված նորմի նպատակն է նաև առանձին անհատների կողմից կուսակցությունների ամբողջական գործունեության ֆինանսավորումից խուսափելը, առանձին կուսակցությունների՝ մեծ կարողություններ ունեցող անհատների ակումբերի վերածվելու հնարավորության բացառումը, ինչից ելնելով էլ Օրենսդրի կողմից սահմանվել է անհատների նվիրատվության առավելագույն շեմի սահմանաչափ, իսկ իրավաբանական անձանց կողմից նվիրատվության արգելք:

Իսախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք

տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյոք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս է պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Վարչական իրավախախտումների վերաբերյալ ՀՀ օրենսգրքի 21-րդ հոդվածը սահմանել է, որ եթե կատարված վարչական իրավախախտումը նվազ նշանակություն ունի, գործը վճռելու համար լիազորված մարմինը (պաշտոնատար անձը) կարող է խախտողին ազատել վարչական պատասխանատվությունից և բավարարվել բանավոր դիտողությամբ:

Արարքի նվազ նշանակությունը գնահատելիս անհրաժեշտ է հաշվի առնել այն հանգամանքը, որ թեև ձևականորեն արարքը կարող է պարունակել Վարչական իրավախախտումների վերաբերյալ ՀՀ օրենսգրքով սահմանված արարքի հատկանիշներ, սակայն ֆիզիկական կամ իրավաբանական անձին, հասարակությանը, պետությանը այնպիսի էական վնաս չի պատճառվել, որի հիմքով սահմանված պատասխանատվությունը դիտարկվի համաչափ:

Նվազ նշանակությունը կիրառելիս անհրաժեշտ է հաշվի առնել խախտման բնույթը, դրա որակական կողմը, ինչպես նաև խախտում թույլ տված անձի վերաբերմունքը խախտման նկատմամբ:

Սույն գործով խախտման (արարքի) որակական կողմը գնահատելիս Հանձնաժողովն էական է համարում հետևյալ **հանգամանքների միաժամանակյա առկայությունը**.

1. Չթույլատրված նվիրատվության չափը (29.485 ՀՀ դրամ) չի գերազանցում Օրենսգրքի 189.16-րդ հոդվածի 1-ին մասով սահմանված իրավախախտումների գործերով նշանակվող տուգանքի նվազագույն չափին (100,000-150,000 ՀՀ դրամ):

2. Մինչև վարչական իրավախախտման վերաբերյալ գործի քննության օրվա ավարտը Կուսակցության կողմից վարչական իրավախախտման վերաբերյալ արձանագրությամբ հաստատված 29,485 (քսանինը հազար չորս հարյուր ութսունհինգ)

ՀՀ դրամ՝ օրենքով սահմանված չթույլատրված նվիրատվությունը վերադարձվել է պետական բյուջե, որի վերաբերյալ ապացույցը ներկայացվել է Հանձնաժողով:

Վերոնշյալ հանգամանքների **համակցությամբ** պայմանավորված՝ սույն գործով օրենքով սահմանված չթույլատրված նվիրատվությունը գումարի չափով պայմանավորված դիտարկվում է նվազ նշանակության ենթատեքստում, ինչպես նաև պետական բյուջե վերադարձնելու փաստը վկայող ապացույցը ներկայացնելու արդյունքում Հանձնաժողովն արձանագրում է, որ նորմով պաշտպանվող իրավահարաբերությունների էությունը չի խաթարվել:

Ելնելով վերոգրյալից, ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, Վարչական իրավախախտումների վերաբերյալ օրենսգրքի 21-րդ հոդվածի 1-ին մասով, 282-րդ հոդվածի 2-րդ կետով և 283-րդ հոդվածով՝ Հանձնաժողովը.

Ո Ր Ո Շ Ե Ց

1. «Վերաձևվող Հայաստան» կուսակցության պաշտոնատար անձ Վահե Հակոբյանին ազատել վարչական պատասխանատվությունից և հայտարարել բանավոր դիտողություն՝ կարճելով թիվ ՎԻՎ/267/2024 վարչական իրավախախտման վերաբերյալ գործի վարույթը:

2. Սույն որոշումն ուժի մեջ է մտնում այն սահմանված կարգով Վահե Հակոբյանին հանձնելու (հանձնված համարվելու) հաջորդող օրվանից:

3. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՅԱՆ